

四庫全書

集部

欽定四庫全書

集部

鶴林集卷十二

詳校官庶吉士_臣瑚圖禮

主事_臣呂雲棟覆勘

謄錄監生_臣汪本中

欽定四庫全書

鶴林集卷十一

宋 吳泳 撰

外制

池州青陽縣協濟廟封惠顯靈應昭澤普濟公

制

勅具某神九華之山神人宅焉其品幽故其神宅其鬼
靈故其德盛當農疇告旱田毛欲槁環邑之士奔走其
祠而禱焉鞭池龍為霆噓聖水為雨頃刻之間澤滿四

野亦可謂有功烈於民矣已建上公再加美號神其懋承之可

臨安府餘杭縣洞霄宮龍神封靈澤公祠制

勅具某神昔景德畫龍以祠雨天聖塑龍于會靈觀亦雨繪像尚爾況真龍哉方旱魃為災百神徧走而未應興自朕懷以默祠禱中使未還而甘澤已滂沱矣建爾上公對予光命可

忠州功顯廟神封廣祐靈濟公制

勅具某神朕聞禱祀於黃河故鳥鳥之聲樂而齊師遁求
助於鍾山故草木皆人形而秦師潛赫然靈光載在往
牒爾顯於西土宅我生民頃因北敵之鴟張加以潰兵
之豕突植紅旗於山上朔騎自奔拖白霧於江中兇渠
斂戢需章來上朕用歎嘉命載衍於舊封肆登加於新
號尚裒陰施以對休光可

卬州依政縣惠顯廟神封博濟靈應孚佑公制
勅具某神古者國有水旱之災則禱於神為民事也矧

金匱要略卷十一
茲有廟宅彼曲山惠綏一方載在往牒亢旱槁苗則雨
應淫潦傷稼則晴舒靈績上聞欽歎無數用視上公之
秩益增徽號之榮尚迪威靈裒對休寵可

潼川府通泉縣孚惠廟神封應濟普惠靈潤公
制

勅具某神通泉古縣也山明而水秀地瘠而人稠神宅
其間民以為命往因西師亡絕潰入中州黃旂章章熊
虎奮怒賊弗敢近民賴以寧發詔靈威濟登徽號尚迪

休寵永綏遐方可

順慶府西充縣利應廟神封忠顯公制

勅具某神先王制祭祀五以死勤事與能捍大患尤為
有功於民爾奮身多難之街奉使叵測之域一介行李
周旋磁相移民於城轉粟於庾亦無負州人矣高皇知
之而磁之人有不能盡知者元身既歿英爽如生以忠
介公顯於東土北兵臨江不敢犯則斯二事豈不應祀
典歟進爵上公肇封忠顯尚朕所以續承高皇之意可

兩佐神封翼惠公助順公制

勅具某神等河神請纓而楚國之師燔山鬼返璧而祖
龍之魄喪爾二將於昭其武有赫厥聲從漢祖入關勲
烈已垂於千祀佐粵王平寇威靈復振於七閩繇其功
盛以化神莫不尸祠而家祝式哀顯跡庸建上公庶幾
長樂二將之祠不減睢陽雙廟之盛可

威州康佑廟神封顯佑靈澤孚烈威濟公制

勅具某神朕敬共明神厥有常祀至於幽贊國家光於

上下又當褒表之以為黔首則爾廟食西土功施於民
頃者諸番侵我漢地神赫斯怒卒能殄殲乃讐其如出
雨興雲反風滅火特其迹也爰秩靈休衍加徽號尚其
歆享可

雅州嚴道縣順應廟神封忠烈公制

勅具某神佑直助順幽明之理惟均褒德表功神示之
祀不廢爾奮自越嚮來游蔡蒙殺偽守以庇民一掃美
新之習指真人而納貢不忘思漢之心生為千里之依

歿作一方之主陰捍邊境默司雨暘有赫厥靈徹于朕
聽用建上公之爵肇開忠烈之封永綏遐方寬朕西顧
可

臨安府昌化縣靈忠廟百丈神封顯應侯城隍
神封順應侯柳湘神封靈應侯制

勅具某神等朕以功詔爵以敬事神凡能保佑於民不
廢褒表之典爾等鼎力幽潛山民依怙旱乾之禱隨應
札瘥之患不生雖京師衆大之區亦蒙靈潤茲肇封於

侯爵庸懃答於輿言尚祇明恩益遠靈施可

南康軍都昌縣英佑廟神封威烈惠利侯制

勅具某神佑直助順幽明之理惟均褒德表功神亦之
祀不廢爾仕東晉董督八州廟食都昌綿歷千載一方
寶祠不但水旱疾疫之禱而已頃者峒寇猖獗陰兵逆
防紅旗章章賊遂宵遁惟神明鑒猶往日擊社殲斬蘇
峻平王敦之心也增錫嘉名尚先王宗功秩祀之意可

建寧府甌寧縣靈佑廟神封孚濟昭應廣利嘉

惠侯廣惠利澤顯應侯制

勅具某神朕適祇宗祀咸秩百神凡領於祝官載在祀典者靡不封爵有差爾等廟于甌寧垂二百禩禦災捍患靈蹟彰聞虎不敢渡河盜不敢入境實惟侯之烈各因舊封申錫二字一曰嘉惠以昭其德一曰顯應以赫厥靈神其懋承之可

徽州英烈廟錢鏐封惠顯侯惠濟侯制

勅具某神昔仲尼有言綱紀天下曰神方建炎辛亥敵

馬飲江蕩搖二浙爾兄弟無尺寸兵在手乃能仗義率鄉丁戰烏珠於桐廬下如挈舟礮石敵幾不能支遂遁去推較功烈當與劉韓並驅而史佚其事朕甚悼焉既列廟祠又班侯爵尚其子孫世篤忠正以休於前功可
施州永福縣嘉惠侯封靈應惠侯制

勅具某神漢破匈奴而風雨之聲皆神兵晉敗苻秦而草木之狀皆勅敵方敵兵犯順邊馬慢防雲安夔子之間軍聲未震神赫厥靈幽贊冥討彼望見朱旗汗馬驚

遁溺死過就招安若爾威靈弗加褒寵殆非所以重依
人尊受職也用覽漕臣之奏申錫美號神其懋承之可
建寧府建安縣神應廟神封昭惠顯應靈助侯
昭佑顯濟靈順侯制

勅具某神河神受玉以濟晉師山鬼持璧以遮秦使昔
疑其事今悟茲理方盜起汀邵間州縣長吏不能安之
神赫厥靈幽贊冥討邦民夜半時聞有甲馬聲此豈足
為異耶賊平而益封尚朕報功之典可

處州麗水縣協應廟神封顯應周澤惠濟昭佑
侯顯濟嘉貺利澤孚佑侯制

勅具某神等山林川谷能出雲為風雨皆曰神矧廟於
麗水宅於風門又能噓石罅之雷以鞭羣動則旱乾之
禱而甘澤隨靈蓋其所也舊為徹侯增都顯號示朕所
以重祠之意可

龍山真聖觀靈感大權尊聖招寶七郎封助靈
侯制

勅具某神朕以神皋衆大旱魃為虐並走羣望以祈甘
靈惟神率迪朕命觸石為雲曾不崇朝雨徧畿甸其為
施博矣爰錫嘉名封之徹侯以見朕先勤民而致力於
神之意可

沖佑觀護法神封協濟侯制

勅具某神朕以旱魃為虐望奔武夷曾不崇朝雨徧天
下山靈仙伯亦既尊顯之矣有司謂爾實護道門霈澤
之功與有陰相封之徹侯其懋承之永以無數可

西和州武顯廟神封靈佑孚惠廣應侯制

勅具某神大兵之後繼以凶年何邊州之不幸也爾邁
迹西土宅祠古岷驅敵而風霆奔禱雨而雲霧滂人孰
不曰幽贊之助用嘉爾績申錫侯封侯其懋承之永以
無數可

臨安府浙江順濟廟神封靈佑顯應公神次子
封助寧佑順侯制

勅具某神以勞定國則祀之為道水之功設也邇者恭

聖發引水道湮塞潮回沙湧不可以舟憑神威靈驅叱
海若安流順波頃刻而濟祐恩載頒有司以益封請朕
用申錫美號神其懋承之可

南劍州尤溪縣惠澤廟神封孚應靈順侯制

勅具臬神朕君臨四海禮馭百神儻有功烈於民何愛
封爵於我矧茲劍浦屹彼叢祠能出雲雨於鴻濛之間
能驅盜賊於倣擾之日爰錫再命用增侯封其懋承之
永以無數可

眉州彭山縣英惠廟神封嘉應侯制

勅具某神神也者氣之盛者也其氣發揚乎上為陽為剛為昭明為忠義神故漢將軍岑謚曰壯侯者廟於武陽國朝淳乾嘉紹間幽贊討賊夜半時聞有甲馬聲今未嘗亡也錫命徹侯用甄壯烈可

佐神封英惠贊烈協應侯制

勅具某神佐神某神六子乾坤之佐也五帝太一之佐也凡尊位乎兩間者莫不有物焉贊之爾左右明神勸

相東土禦災捍患厥有靈光益衍侯封以綏廟食可

太學土地特賜靈通廟額封正顯侯制

勅具某神古我先王各因其方以祠后土示有主也矧
司我首善之地而不褒表之歟方紹興建學爾以聰明
正直妥靈其間凡鼓篋而入解褐而出莫不駿奔走在
廟用物宏多厥靈炳著不但呵星妖叱鬼怪而烝我髦
士發揮斯文以為邦光亦有陰助焉矣錫之徹侯都以
美號尚庶幾敬祭重祠之意可

饒州德興縣思惠廟神封文昭清孝正烈侯制
勅具某神桐鄉之愛朱邑而祀於桐鄉石室之慕文翁
而祠於石室儻有功於仕國宜與享於祝官爾仁明而
莊正直而壹設學官於邑戶有隆山之書行義役於民
家藏縣令之譜生則班於循吏歿則典於明神英魂所
之昭答如響矧翦兇徒於洲潯復驅厲鬼於山阿爰酌
輿言再都美號蕙肴蒸兮蘭藉想清德之猶芳荔子丹
兮蕉黃尚靈旂之來下可

神次子李兵部道傳封文惠侯制

勅具某神朕聞人者鬼神之會也生而為英歿而為靈其氣發揚而為昭明其體魄降而為百物之精況夫賢者又萬靈之一秀則命之曰神豈不足以為黔首則哉爾坤維可珍隆山之子江東倉庾氏之使其事君則鯁鯁諤諤以直諒聞其治民則惓惓惻惻以廉平著德興舊有李長官祠東人德汝遺愛亦復以汝侑食於縣爵為通侯賁以文惠尚士與民嘉魂合莫之意可

忠佑廟神封英濟忠應靈惠侯制

勅具某神朕嘗謂將軍有大忠于漢而功不入表行不立傳史氏失之當劉項相距京索間興亡之幾不能以守而侯乃詐乘黃屋誰羽軍滎陽啟炎漢四百年亦可謂奇矣縣故有叢祠水旱必禱賊兵睨之不敢近非神遺風餘烈有以動悟之而何載視徹侯中錫美號庶幾扶龍之人世世子孫茲明祀可

慶元府鄞縣賀成廟神封靈濟侯制

勅具某神崧高之詩曰維嶽降神生甫及申天地扶興
之氣盤結而生人物於其間未有無神焉祐之也爾廟
食于鄧自建炎初靈跡已著挺生碩輔勸相我家將以
紀綱天下豈但時其雨暘而已哉載都廟號肇錫侯封
俾海濱之民世世子孫絜明祀可

安吉州歸安縣善利廟神封威濟侯制

勅具某神龍津以雙劍發祥涪陵以刁斗肇祀天地間
昭明剛正之氣蓋有鍾於物而為神者矧元和相國奉

命征討宿師之地以矢志之自唐迄宋靈異濯濯其能
却飲江之戎馬去害稼之螟螣皆矢之餘也肇封徹侯
以詔嘉德可

龍州江油縣牛心山顯濟廟神封顯應忠惠王

制

勅朕聞之仲尼曰山川之神足以綱紀天下蓋不但為
能出雲雨設也具某神昭明而體物正直而依人相彼
江油宅於巖屋發縱指示潰卒就擒鳴鼓張旗醜夷自

北凡蜀道底寧之効亦爾神幽贊之功朕用嘉之申錫
徽號王其益侈宏休以佑吾民民亦將世世奉王無怠
可

靜江府義寧縣惠寧廟神封英濟王制

勅朕聞之仲尼曰山川之神足以綱紀天下蓋非但為
興雲致雨設也具神某昭明而體物正直而依人乃眷
桂林實控嶺海徃丁出役省地繹騷若非幽贊於神明
安得永清於郡邑昔也建上公之爵既極顯榮今焉即

真王之封益昭徽數尚其英爽不昧欽承可

衡州茶陵縣福清廟神封亨佑昭應英惠王制
勅瓊玉不畀而楚師燬草木皆兵而苻秦敗國有山川
封守之神非但興雲致雨也具某神昭明體物正直依
人盪定水波屢濟漕舟之阨陰驅甲馬汜收平盜之功
朕用嘉之申錫嫩號尚憑寵命益懋靈釐可

信州貴谿縣自鳴山孚惠神廟封威德英濟忠
惠聖烈王制

勅漢破王邑於昆陽雷風撼屋晉敗苻堅於淝水草木
皆兵大而却敵小而平賊幽冥之間豈無神物之助耶
具某神興自典午垂八百年用物精多靈跡特異方盜
起三衢官軍未集神赫厥靈幽贊冥討人望見其赭袍
汗馬羅列而拜未幾而渠魁就戮豈非倚神之力耶王
舊有封茲易二字事無不通曰聖民無不安曰惠益懋
顯德以承寵光可

成都府永懷廟神封忠烈廣福仁佑文惠王制

勅昔漢宣帝聞益州金馬碧鷄之神遣使持節求之今
載祀典領于祠官者又不但金馬碧鷄之神以忠義而
祠於眉者二孟昭圖之於墓頤津花敬定之於東館鎮
是也具神某英風蓋世勇畧過人當子璋僭叛時卿特
成都一牙將耳乃能手鋤元兇以五六州挈還唐之職
方使高祖當此時必不興猛士之歎孝文當此時必不
起良將之思其明威義烈亘萬古而如在所謂鎮蕃部
擒潰賊特其細也爰即舊封再加美號尚時式享以奠

四方可

佐神封靈佑王制

勅古者至敬不壇今廟貌像設徧於州縣不可謂智然禮緣人情凡可以義起者亦所不廢也具佐神某神能贊而長功於民捍患禦菑式克顧享申錫王封用答揚爾烈爾其懋承之可

撫州崇仁縣梅仙封靈虛妙隱真人藥仙靈紀
妙濟真人鄧仙靈一妙應真人葉仙靈白妙通

真人制

勅具某真人等朕聞真人恬漠獨與道息而猶假封號
焉不可謂知然靈跡之著遠近彰聞驅蝗而蝗不為菑
施藥而藥能療死則祀之亦人情之所不能廢也其詔
祠官增崇徽號永垂道蔭以庇邦民可

永康軍青城縣沖妙觀何中仙封靈惠真人制
勅具某神漢作飛廉桂館以求神仙自求多福而已非
為民也爾以詩鳴蜀賁于寶園生則德行道義之望無

不欽歿則水旱疫厲之禱無不應祠而祝之亦人情之所不容廢也用錫徽名永宏道蔭可

隆州井研縣宅真觀蔡真人封仁格真人制

勅具某神朕聞真人恬漠獨與道息又豈假封號之榮哉然紀功崇祀亦國之所不廢也爾靈異之跡著于三隅捍水而漲不為災驅蝗而物無疵癘凡以誠禱如響斯答朕安得不汝嘉其詔祠官載錫徽號苟能用力於仁則報功之典無數可

沖佑觀仙女胡氏封普應真人李氏慈應真人
魚氏順應真人魚氏助應真人制

勅具某仙等朕聞真人恬漠獨與道息然心誠求之則未
有不感通者也爾等靈異之跡著於武夷生則保形鍊
氣于巖之隈歿則駕風驅霆以雨徧天下朕用嘉之載
錫徽名永宏道蔭可

沖佑觀真人封沖妙孚惠真人仙人張湛顯應
真人孫綽靈應真人趙元奇妙應真人彭令昭

沖應真人劉景嘉應真人顧思遠靜應真人白
石善應真人馬鳴生惠應真人制

勅具某仙等漢作飛廉桂館以求神仙為已也非有志
於求民也屬者旱魃為虐靡神不宗以武夷之巔神人
所萃望走洞府以祈甘霖不崇朝之間觸石而雨朕安
得不嘉之爰錫徽名以宏道力可

欽定四庫全書

鶴林集卷十二

宋 吳泳 撰

詔

皇帝賜皇后明堂賀表答詔

朕祇迪舊章適嚴宗祀黻冕之美皆出親蠶之共豆籩
之嘉實繫流衍之助清明鬯矣福履綏之載披慶函式
獎勤意

賜貴妃明堂賀表答詔

朕出祿清廟入熙紫壇凡泰元神媼之顧歆皆月后星妃之協助甫還詔蹕首閱露封頌禱既塵歎嘉弗已

賜美人明堂賀表答詔

朕肅蠲剛日祇見合宮璧玉華光笙鏞純繹荷蒼靈之來格覲熙事之備成載閱露封良深嘉歎

端平三年罪己詔

勅門下朕以寡德君于萬邦惟皇天既付中國民實任寵綏之託予小子不替上帝命欲圖紹復之功豈期輕

動於師干反以激成於邊禍至延強敵薦食神州虔劉
我西陲蹂躪我襄土近至淮堧之地亦成戎馬之場宅
里墟於青煙甲卒屠於白刃凡三百年之生聚教訓與
數十郡之城郭封疆憑陵無厭荼毒甚慘斬桑伐棗破
屋流離之狀朕既不得而見慈父幼子寡婦哭泣之聲
朕亦不得而聞其如關頭潰散之軍塞外畔亡之將或
者撫循之失道因而怵迫以從夷序言其情誰執斯咎
皆繇朕責治太速知人不明誤信佳兵之言弗思常武

之戒拊心若厲欲悔何追朕今退自省躬益皇敬德念
三軍暴露之久憫百姓轉輸之勞敕不虔之吏以賑新
甿捐不急之費以資戰士問傷弔死錄善棄瑕庶幾與
子同仇之人咸奮敵王所愾之志以遏絕寇虐以攘除
姦凶降服而哭殽函之師尚增脩於國政下詔以陳輪
臺之悔益申儆於邊防凡懷忠良各勵勲業故茲詔示
想宜知悉

賜魏了翁督視江淮便宜施行詔

朕以皇天畀予有家懼德弗荷比年戎寇迭我邊陲赤
囊屢聞旰食靡暇爰簡樞庭之望俾督諸道之師南連
江淮北抵襄漢盡護諸將以張皇威師徒之有不惠不
懋汝訓齊之師乘之有不輯不和汝調一之益張乃猷
毋失其統然而事從中則難度帥稟命則不威必進厥
良率其不良而後可以作興人材必賞用命戮不用命
而後可以激勵將士爰考紹興之彝典式頒臣浚之詔
書悉聽便宜毋拘文法庶幾帥友邦之衆可以成敵愾

之功故茲開諭想宜知悉

賜鄭清之以久雨乞上丞相印不允詔

省所奏具悉朕親政之初考謹輔相以卿抱道守正冲澹宏雅退然有古君子之風是用疇咨使宅百揆端平以來圖事揆策既與卿共焦勞矣未嘗一日共其逸也迺者蟲賊內訌靈潦為沴豈天所以大警予耶昔乾道間淫雨不止首相顯乞罷政表至再上聖諭丁寧且曰不必如此此皆朕失皇祖有訓卿尚何辭所請宜不允

賜喬行簡以久積霖雨乞解丞相不允詔

省所奏具悉當堯之時降水汎濫堯不以責諸臣而曰
做予春秋之季天作淫雨宋公不以尤諸人而曰孤實
不敬以災異策免三公漢末世事也矧卿壽雋之彥年
耆德明朕以萬幾至繁故命置諸右相與調燮佐理入
秋以來積雨傷稼方欲詢茲黃髮以免所愆而卿尚得
以堯佐年高為言耶傳不云乎肅時雨若不肅則其罰
常雨君臣上下以作肅之道相警毋費辭所請宜不允

賜喬行簡以久積靈雨連旬再乞罷歸不允詔
省所奏具悉頃者夏五月入畢太史占之謂為雨淫水
溢之象已而連月不止不但予一人以為憂二三執政
亦莫不共憂之也卿佐理陰陽再疏乞上丞相印綬朕
豈不悉但稽之先朝陳康伯朱倬以久雨待罪高宗曰
罪在朕躬豈可移過大臣魏杞葉顥以靈雨不止乞罷
政孝宗曰實朕不德方賴卿等克脩庶政以致消弭朕
但知常雨之罰弗加於大臣而已卿所援彛章却不為

此所請宜不允

賜喬行簡等以星雷示異乞退不允詔

省所奏具悉昔昭王不以赤雲之異移於司馬孔子以
為知道景公不以熒惑之變移於相子韋以為知言春
秋列國之君猶能克己就義不寘其咎於股肱矧雷君
令也而朕又焉敢移之以震恐懼脩省以益遷善改過
朕方欲回怒渝以帥彼天常則亦賴卿等變和贊理懋
德奮庸汔濟乃辟于乂顧援漢末世策免之文欲上丞

相印歸丘園朕所不取所請宜不允

賜喬行簡辭免加恩不允詔

省所奏具悉朕獲執犧牲珪幣以承上下神祇薦鬯之
夕昊天降威以示譴告何敢專咎股肱况卿次輔也秉
德陪朕而乃援故實祈解印綬殆非朕志召還東第入
侍經幄恩禮既與宰臣等則侍祠錫祉自有孝皇賜浩
典冊在又何遜所辭宜不允

賜鄭性之以臺章乞賜罷黜不允詔

夫御史天子耳目豈容蔽耳目而不言執政猶吾股肱
安可廢股肱而獨運朕已勉諭卿毋牢辭

賜趙彥忱辭免除權書不允詔

卿明足以別羣材之鑑平足以持四選之衡自攝二卿
總理微密予奪一出於公朕不欲遷之他官者破吏奸
也所辭宜不允

賜許應龍辭吏部兼侍讀不允詔

以卿履行純淑色氣和平勸講路門敕繹詩訓其於朕

進德脩省抑有助矣昔劉拱以供奉翰林攝周必大以掌選部陞乾淳之風比迹三代卿欲固辭則是不以乾淳望朕也所辭宜不允

賜李臺辭同知四川宣撫不允詔

治民如治亂繩朕固無拘於文法望君如望慈母爾其思懌於國人亟往于宣母宜多遜

賜崔與立辭免右丞相不允詔

樂君子之樂固無軒冕之情憂天下之憂猶有君臣之

義盡云來止毋勉遁思

勅

辛息授防禦使勅

韜藏武畧曉暢戎情築定遠之城以一身而護塞調安
豐之卒不踰月而殲渠爰念勤勞之久肆升捍禦之班
王霆授武功大夫勅

奮自右科優於將畧出則荷戈與父蹈厲而發揚入則
束帶立朝雍容而閒雅寧輟九賓俾授一障

錢纂權發遣容州勅

容州控維百蠻襟帶五管漢唐以來重鎮也命汝為容
浦太守宜靖綏闊蚤俾無南顧之憂

陳卓授正議大夫勅

卿行介而和氣莊而肅能典朕禮蔚有寅清之風其代
予言實存溫厚之體

賜保寧軍官吏軍民僧道耆壽等勅

朕以謝奕昌胄出相門嫻連戚畹恂恂德行尚存小侯

入學之風暨暨戎容蔚有大將登壇之望眷言星婺實
屏神京班雖在于龍墀威已信于虎鉞提封所暨贊善
惟均

賜保康軍官吏軍民僧道耆壽等勅

朕以謝奕禮敬爾威儀嫺於詩禮宣麻帝殿已蕃褒紀
之恩授鉞將壇益邁戍申之士相彼古庸之地爛其雙
節之臨若耄若倪而兵而吏想逖聞于成命咸大慰于
輿情

賜資政殿學士新知潭州魏了翁夏藥銀合百

兩勅

勅某視師江上未酬敘府之勞作鎮湘中復冒畏塗之暑頒冰在候賜藥以彝式廣上恩更詒民瘼

賜資政殿學士新知眉州李臺夏藥銀合百兩
勅

勅以卿故鄉之懷遠道于役冒六月之暑如愒如焚溯三峽之濤如震如怒可無尚藥之賜以示宗工之思

賜寶章閣學士淮西制使兼沿江制副知鄂州
史嵩之夏藥銀合勅

勅遐念制臣宏開邊閫韜藏龍虎甫息精神野宿貔貅
寧無暴露爰即頒冰之候式分上藥之珍其溥恩光永
蠲祲暘

賜四川制置使趙彥呐夏藥銀合勅

勅申宅南交正于炎序乃眷西顧懷我宗臣矧更原上
之久勞冒人間之執熱式頒良劑往示優恩

賜權工侍四川安撫制副丁黼夏藥銀合勅

勅卿以詩書之望而帥三軍以壽雉之賢而在遠服屬
此南訛之候軫于西顧之恩爰錫溫綸式頒良劑

賜兵侍淮安撫制置使趙葵夏藥銀合勅

勅眷我制臣久于淮甸飲冰持糒豈不思將士之載饑
鑠石流金亦曾念邊氓之執熱爰錫上奩之劑式昭中
康之恩穆如清風綏爾有衆

賜工侍沿江制使兼江東安撫知建康兼行宮

留守陳韓夏藥銀合勅

勅久以威名勞于牧禦麟符居守當江上之風寒羽扇
麾軍冒人間之炎熱式頒上劑昭示惓懷

賜祕閣修撰知江陵府兼京西湖北路安撫制
副別之傑夏藥銀合勅

勅朕國倚西門重踰於諸鎮日行南陸熱倍於常年圖
任舊人式頒新劑庶品嘗於藥石以身作於金湯

賜煥章閣知慶元兼沿海制司職事趙與憲夏

藥銀合勅

勅朕臨遣帥臣控扼海道屬茲瘴暑眷彼遐征式頒藥劑之珍以助節宣之用

賜兼權侍衛馬軍行司公事知黃州孟珙并諸路都統制夏藥銀合勅

勅朕身居殿閣心運邊陲眷予守圉捍敵之臣咸有執戈衛社之志久于暴露加以炎歊升糲半冰勞苦想同於卒伍寶奩珍劑清冷首及於軍門

賜保康軍官吏軍民僧道耆壽等勅

朕以貴謙魏王之孫沂邸之子分璜佩玉既久典於留
臺植節建旄宜宏開於鉅屏遂即上庸之壤式昭半楚
之封遙想吏民悉陶風化

賜武康軍官吏軍民僧道耆壽等勅

朕以與芮魯衛之穆開平之賢宣文德之麻既懋展親
之典授武康之鉞仍疏胙土之恩若吏若民而兵而士
想聞嘉命式慰輿情

口宣

賜謝奕昌除節鉞口宣

卿相門之彥戚畹之良茲特舉於渙恩俾專持於節鉞
往祇明命允迪令猷

賜謝奕禮除節鉞口宣

卿譜系大相源流小侯久聯賓閣之華茲畀節樓之寵
往祇予訓圖懋厥官

賜鄒得龍除僉書兼參政口宣

卿雅以人望蔚為儒家晉典鴻樞仍參大政宜祇承於
渙命母教廢於需章

賜鄭性之除參政口宣

基命斗樞之庭參謀鼎鉉之府蔽自朕志諧于僉言亟
祇渙綸母贊謙牘

賜李宗勉除同僉書口宣

阜直諫之囊出從騎省筦神兵之務入典鴻樞已沐師
言母煩撫牘

賜洪咨夔內翰口宣

禁闥蓋臣詞林鴻筆久視鑿坡之草茲陞學士之真宣
召有嚴式承光命

賜李鳴復除參樞口宣

文昌王之喉舌言論既孚北斗天之樞機訏謨惟允豈
宜控避往亟欽承

聖節賜三省官乳香口宣

虹生華渚適逢正月之和鷺集明庭咸祝萬年之永爰

頒寶篆以資法筵

賜右丞相崔與之不允辭口宣

卿清德瑞時忠勲貫日來伯夷於北海豈應林壑之留
起安石於東山實倚廟堂之望母容隱蔽宜疾馳驅

賜與芮永斷來章口宣

卿以親屏周以德輔漢出節旄於少府播綸綍於大庭
往欽茂恩母忘忠報

賜楊谷加恩口宣

朕宗祀明堂饗親事帝受釐宣室左戚右賢盍增采邑之華祇服綸言之寵

批答

賜鄒應龍上表辭僉書不允批答

卿歷踐詞垣直青瑣闥動閱三四十十年英名高節朕知其有廊廟之器久矣偕籌密席參貳宰塗尚恨其晚復何以辭

賜鄭性之辭參政不允永斷來章批答


今天下大政豈無所當先者卿其以所聞於師者正身正君以正朝廷百官則天下之事無不綱舉矣

賜喬行簡特進左相不允辭批答

維師尚父年九十杖鉞睿聖武公越九十有五入相丹書爛然懿戒勤甚此所以作周孚先也

賜李端懿讓恩命批答

卿聯國懿戚惟時茂才久居留使之權俾委將麾之任允孚輿論毋執撝謙



欽定四庫全書

集部

鶴林集卷十三
四

詳校官庶吉士臣瑚圖禮

主事臣呂雲棟覆勘

膳錄監生臣溫廷鑑

欽定四庫全書

鶴林集卷十三

宋 吳泳 撰

祝文

皇帝祈晴設羅天醮一千二百分位祝文

伏以星殷仲秋甫轉金行之度天作淫雨致貽寶穡之
災未且穗矣而爛於場田皆汙矣而堙於水脫有邊烽
之告警凜乎國計之莫支板除邃殿之嚴緇閔冲科之
秘伏願開豁乾象劃剝雲根杲日既升盡滌羣陰之障

豐年其有輯成五福之基

春祭諸廟祝文

惟古者諸侯得以祭名山大川之在其地者禮也今以
邑大夫之職而亦許之禱於山川之祠令也有其舉之
其敢廢之肆以季春式嚴常祀伏惟時其雨暘俾民用
平康而物無疵厲則某與邦之民報神之德其永無斁

秋祭諸廟祝文

詩之豐年曰秋冬報也春之時省耕而太守不及省也

夏之日祈穀而太守不及躬以祈也今秋已成矣稻穗
且熟矣乃獲與南畝婦子享此樂歲豈非神之祐哉祀
事有彛不敢不恪

國家水旱神司其權字民者任其責某為邑長於斯跨
三年矣旱不為災水不為沴年穀用登田里胥樂寧非
神之賜耶春祈秋報厥有舊章敢羞牲酒用酬神貺惟
神昭鑒而終惠之

古者諸侯必祭於境內山川之神者禮也爰以季秋祇

率厥典申飭乃僚用修其報吏不忘神之德神不忘吾之民使來歲之稼豐於今歲之穡則民之願也

古者諸侯得以祭名山大川之在其地者每歲季春厥有常祀有其舉之其敢廢之用是以月之既望祀於有廟伏惟時其雨暘使麥既實而穀有秋則神之惠也侯之望也亦民之福也

大易假有廟必於萃卦言之蓋敬者德之聚而神之舍也今太守甫胝印首謁諸廟是以有精爽交乎神明過

三日以往則役於事矣祇謁之初敢抱易以告

吏出守此土神廟食此土吏司其明神司其幽政事不
修刑罰不中吏不敢辭其責若夫時其陰陽節其風雨
俾民無水旱疾疫之災則惟神實相之蓋國家三歲一
易吏而神則千萬年永保民也某始至三日敢以誠告
某惟令近民者也而於神為尤近動靜語默神必知之
而况荷民社之重寄水旱之託則賦斂之過厚刑罰之
失中神豈不降罰厥躬以示譴告去年之夏厥水為沴

民之昏墊聞者惻然今偶為邑長於斯捍水防民此第一事而力未暇為也則共神明崇廟祀以厭水災不敢不敬

正月之吉始頒教治已宣布於寬書大禋之禮必禱鬼神欲導迎於豐歲吏職其顯神司其幽願憑嘉德之昭靈以起蒸民之難阨方祇厥事式寫我心

祈晴祝文

陰居大冬時寒則應序天作淫雨太過則為災矧當農

務之未休重以田功之始播婦聞鸛而興嘆丁抱薪而不炊使人至斯皆吏失職爰露一忱之精禱仰干大覺之垂慈伏願慧劍劃雲法燈破闇皇天不瞽獲瞻杲日之明后土得乾預卜來麴之秀

閱月不雨則告旱甫蒙霑足之恩平原出水則書災易致浸淫之患雖咨怨乃人情之常態而變遷亦造物之至難既掌此邦當職其咎豈惠心之未遍抑刑典之失中所以亟疏決以哀庶獄之不辜屢賑貸以濟百姓之

不瞻更憑道力密轉陽機雲霽漲平無商羊之起舞年
豐穀熟有銅雀之再鳴

國有大故方深慮患之私天多沉陰未覩開晴之日稻
既穗而雨不得獲麥可播而雨不得耘若其浸淫於十
月之交豈不貽害於三農之務靜省狂恒之咎率由紕
政之愆敢不洗心專於事帝伏願劃蠲雲翳浴出陽明
曰霽曰驛曰蒙既諧吉筮實堅實好實粟汔用康年
星正仲冬天作靈雨四境之內不治固欲安之三日以

往為霖是謂過矣况錢荒而楮會弗起米貴而薪芻益
高雖多方求濟於生民而厥罰未消於咎證用殫忱悃
仰叩高真伏願壓盡陰霾翻作雨雪漙漙之瑞豁開陽
彩庶瞻出日杲杲之光使行旅者有阜通之期而邊戍
者無暴露之嘆凡隸吾土悉蒙慈休

五穀熟而有年證方協序平地尺為大雪過則書災雖
去春尚有於一旬而涉歲已更於三日新濕如桂而民
食病衣冷於鐵而師人寒為長於斯當職其咎用潔藥

宮祇園之薦仰祈玉清天宇之晴伏願睨消陰霾綺散
陽采洗六兵於北漠已占休息之期祝萬壽於南山更
覩清明之景

比歲不登方議賑民之乏淫雨蚤降又貽害稼之憂固
非我佛之不慈亦豈衆生之共孽咎在長吏罰為常陰
伏惟觀世音菩薩以慧燈破闇為明以杲日滌昏為覺
劃開萬象俾瞻初出之光拯活羣生庶免薦饑之患一
誠懃禱三寶證知

神泉縣祈晴祝文

維暮之春已切來麴之望崇朝其雨忽貽害稼之憂既
非上帝之心亦豈下民之罪實繫令謬有戾人和致令
穡事之久妨馴致淫陰之不解弗憑佛力曷挽陽車伏
願擘起祥雲昭垂杲日八極九天之上濯濯厥靈一同
百里之間芄芃其麥

寧國府祈晴祝文

豐年多黍稌已占大有之祥淫雨害榮盛忽致狂恒之

卷十三
咎既非下民之罪亦豈上帝之心昏繇牧守之不良政
刑失當若匪依憑於道力何能感動於天明輒露衷忱
以祈顯相伏願劃其陰翳盡呈露於乾端暴以陽光終
結成於兌寶不但盡歲功之緒更希策秋獮之勲嘉與
編氓導迎景貺

天慶觀祈晴祝文

伏以天多沈陰每望秋陽之暴星有好雨忽貽歲事之
憂憫后土之不乾籲皇穹而請禱伏願高真洞格盥饗

潛通穡寶既堅可備粱盛之薦師干不聳永無烽燧之驚

祈晴奏告天地文

伏以宗祀明堂正欲梁盛之備天作淫雨忽貽稼穡之
瘁憫后土之不乾籲皇天而請禱伏願一忱貫徹三極
感通誅黑蜮於荒郊劃其陰翳推赤烏於暘谷兆此豐
年

社稷祈晴祝文

伏以宗祀明堂正欲穡盛之備天作淫雨忽貽稼穡之
痒敬以精忱禱於方社伏願祐其陰翳誅黑蜮於荒郊
覲以景光推赤烏於暘谷更資鴻福迄用康年

祈晴社神祝文

社于國中有祈有報方以雨謝復以靈告惟社之神官
地之道惟稷之靈司稼之寶惟后土氏水土是平惟后
稷氏百穀資生惟風雨師澤潤萬物惟雷電神鼓動羣
植克相上帝皆著靈德所以九州各建遺壇雨無水溢

暘無旱乾惟此宣城山瘠土薄豈圖夏五霖潦交作滿
集溝澮山為水祥民實何辜吏則不減用率府吏薦以
清醕冀開陽光永福茲土庶其屢豐多黍多稌

諸廟祈晴祝文

按五行志廢祭祀不禱祠則有水災某自出守茲土敬
共明神春祀秋賽靡不秩舉亦曲荷神休矣月書夏五
梅雨成霖后土不乾平原出水推其所以致災之故豈
祝告不虔歟豈燎香不潔歟豈酒牲酸且瘠歟抑政令

逆時歟或刑罰不中節歟戒謹恐懼有以貽神之譴而遺斯民之害也茲用遣官遍謁于廟惟神益茂嘉德盡收積潦俾陰陽節風雨時民奠居而田多稼則千里之國永拜神之賜於無斁

社稷祈晴祝文

冬不祈雨春不祈晴時之常也冬行秋令天時雨降時之變也頃以郡政失平陰雨為沴是用禱於社于稷惟神達天之氛神地之道使太陽之景曜靈而來歲之稼

順成則神之惠也抑某之願也

諸廟祈晴祝文

方春載陽淫雨為沴麥既穗矣而雨不得發其實也穀
且秧矣而雨不得茁其芽也沈陰不解必壞穡事用是
乞晴於爾神明有能劃陰雲豁出暘景使年穀順成
不凍餒吾赤子則神永有飲食

萬物莫潤乎水過則為災三日以往為霖沛然孰禦非
憑神力曷障洪流伏願貝闕潛通珠宮密佑祥雲覆隴

蝗無害稼之憂巨漲復槽鴻有安居之樂

方春東作淫雨蚤降麥既穗矣而雨不得發其實也穀
且秧矣而雨不得茁其芽也沈陰不解必壞穡事重惟
國之有社有稷所以達天地之氣節風雨之宜縱陽閉
陰惟神之惠用是乞晴於壇有其相之太守與邦民敢
不選牲擊鼓以報靈德

越州圓通寺謝晴祝文

頃以積雨為沴下民其咨自某日立秋若沈陰之弗解

至招搖指亥喜陽景之漸舒爰滙衷忱以伸報謝曰霽
曰蒙曰驛尚晴意之未堅時雨時燠時暘庶高靈之終
惠

諸廟謝晴祝文

瞿瞿其陰崇朝其雨后土不乾皇天幾瞽杲杲出日日
出之光金星雜垂鼓鍾其鏜鴉噪于田鴻集于澤爰刈
我禾復耰我麥刈者欲晴耰者負暄匪侯爾私實神爾
恩有飮其香有冽斯酒爰率乃僚告於有廟惟神仁明

克相厥終綏我有邦年穀屢豐

天地社稷謝晴祝文

頃以沈陰干陽積雨為沴自立秋之日至十月之交分
遣庶工遍走羣祀每加精禱靡不格思用涓良吉之辰
以答高靈之貺曰霽曰蒙曰驛尚晴意之未堅時暘時
煥時寒庶來薙之有望不徒報謝兼露懇祈

社稷謝晴祝文

昔文仲孺之守長安也以淫雨妨農詣於社而請之其

夕發夢曹掾明而大霽人皆德太守而靈社稷也今繆
守以積雨之故借陽明於神之靈一念所通羣陰盡掃
非神力回天其孰得與於斯敢率百僚以謝

諸廟謝晴祝文

農田苦雨禱爾於神祇天宇開晴暖之以日月凡此感
通之速莫非相佑之靈更望宿麥登場早有食新之望
新秧出水永無斷種之憂庶惠康境內之民盡銷弭海
濱之盜

社稷謝晴祝文

大田多雨禱爾於神祇后土得乾暖之以日月來甦既
碩嘉種維新更望成此歲功咸有穀熟年登之象錫之
景福更無木饑火旱之災已應春祈尚圖秋報

大雄山白虎洞敏應廟祈雨祝文

伏以三時務農饑彼南畝四月不雨病於夏畦矧疆事
之孔殷重民生之艱食即不幸有方千里之旱其何以
安億兆民之心用咨廷臣徧走望祀伏願山靈下格澤

氣上通鞭駕風霆盡洗如焚之魃作興雲雨頤蘇垂槁
之苗

諸山禱雨祝文

徑山天目龍
井廣德洞霄

伏以庶民惟星所望者歲四月不雨恐傷於農矧當師
旅之未休顓以糗糧為司命麥已登矣而新穀不得以
秧蠶且簇矣而艱食不得以粒若稔成於旱暵豈不蹈
於憂危用咨百工徧走羣望伏願

洞霄云靈旂來格道
化滂流諸山云山澤

通氣風霆流形廣德云
呵叱鬼怪鞭驅風霆

雨我公田既咸宜於黍稷饗于

世室庶無害於榮盛

欽定四庫全書

鶴林集卷十四

宋 吳泳 撰

祝文

祈雨祝文

社稷

民生之命莫重於穀國中之神莫貴於社古之人水旱
風雨必禱於其地者祈穀實也今田苗已穗矣而日曝
之雨信已通矣而風閣之若非明神庇我穡事則東作

廢而西成壞矣燎鄉醺酒惟神終惠之

諸神

新穀既升稍緩求荒之責時雨不降又深害稼之憂鸛
巢棲垤而不鳴龍骨掛梁而復下非仰祈於甘霖恐立
壞於垂成用殫一忱遍走羣祀伏願叱風霆而密運沛
膏澤以滂流既霑既足既渥既優盡除妖魃實堅實好
實發實秀永保嘉生

風師

六月怕十七月怕半風之候也自季夏以來時雨不降
民所望雲霓也而吹使離之穀所仰膏雨也而吹使散
之早禾晚稻幾壞於成用率官僚致禱壇壝惟神歛陽
烏之景祛海鳥之災使沛然其澤下於民則吏與邦人
有敬焉何敢訟

雷師

天地未解雲雷方屯新穀既升時雨不降用祈于社復
禱于神幸鞭霹靂之車密沛滂沱之澤使電交至而雨

金少府月令卷十四
滿盈則神之仁也亦民之望也

雨師

蚤穀將升晚禾且穗田以旱告憂心如熏東作既勤矣
將合仞者只數日也西成在望矣欲傾盆者只一雨也
吏職其顯神司其幽鞭雷車搖電幟壓終風霈甘澤俾
集溝澮皆盈特在神闕闔轉移間耳某率耄倪敬共以
候

祈雨祝文

廟步

水旱不時祭山川之神古諸侯事也某自去歲出守是
邦肅雨又暘粗得一稔今春以來大雪壓土麥不得芄
芄而茂也柔桑蔽空蠶不得羸羸而盛也四月之閏又
以旱告脫或秧稻失其候民饑盜起豈不關千里利害
哉敢潔瓣香以祈甘澤興雲致雨惟神其惠之

社神

在詩旱則祈於方社在禮裁則祀於社祠古者諸侯凡

國中有水旱疾疫之事不但禱於境內山川之神而已
後世治不知本燎薌寺觀用牲廟宇便謂知典禮之大
抑不知受風雨達天地之氣莫貴於社也今夏閏告旱
敢不忱禱惟神佑之甘雨隨靈則邦之望也民之幸也

謝雨祝文

社神

惟守令古諸侯也嚮者試邑西州有水旱凶荒必禱於
社每禱則輒應今假守於此民以旱告遂援百里之庇

用之千里之邦曾不浹旬甘雨隨應神之佑於有土有民廼如此敢不敬共以謝

廟步

賽雨敬亭厥典維舊眺以脣薌耒以牲酒某忝侍臣繼兩公守我蠶既登我麥實秀豈圖妖魃為我民疚禱祠名山奔走在廟維神憫民密鑒左右指麾雨工手擘雲竇粳稻可秧苧麻可漚水旱不災年歲其有樂以五成牲以三豆神其顧歆永以孚祐

勾谿禱雨祝文

惟水旱不時祭山川之神此古諸侯事也而士得以行之非獲已也吾鄉之俗土曠而瘠民良而貧士循禮畏法而窮無水旱而猶水旱也况六月不雨至於秋七月耶今稻已秧矣而槁不得滋也芋已區矣而焦不得沃也脫或公上有不時之科須罔測之號令則農之家不得儲粟矣士之家不得祀茲酒矣四山之木不得息且潤而如彼其濯濯矣民窮至此更不待戈楮喉而斧伐

命也是不可不闔國之衣冠選牲釃酒用幣禱之於神也尊神其閔之俾雷雨之動滿盈四郊庶幾上下各有函活之意神之惠也民之望也士之志也

謝雨祝文

海神

天地左海為百谷之王山川出雲不崇朝而雨雖造物好生之意亦威神贊化之功溝就涸而復通穀垂焦而遍活驗占風之鐸已無七月半之虞續志喜之書猶有

三日霖之望

祠山城隍

比者勤閔斯民敬共有廟一穀不登之謂歉恐荐致於
年饑三日以往則為霖喜獲通於雨信禮有祈則有報
物成始而成終更仗威靈益昭顯相粳稻香兮雨足胥
樂豐年荔子丹兮蕉黃願歆芳祀

社稷風雷雨師

社神地之道稷司稼之寶潤以風雨鼓之雷霆國有旱

曠凶荒之災而不致禱於茲者是之謂不知本也方閔
閔望歲皇皇求雨即其本之所自出日率僚吏有請焉
嘉賴神休造需甘澤物無疵癘穀用順成敢不敬共以
謝

祈雨祝文

昭澤侯

國家令典縣有水旱則禱于山之神誠以興雲致雨神
實司之惟神宅彼南山奠我四境比者以旱有禱於神

逆降膏澤今又踰浹日矣而陽驕不挫雷鳴之田水竭
土圯用敢援令典以修明薦伏望赦吏之謬憫民之生
殷其霑于山陽霈甘澤於境內某與百里之民跂立以
冀

諸廟

縣有水旱詣神祠祈禱此國之令典也比者四境之內
亢陽為災雷鳴之田水不滿盈民心磬磬靡所戾止令
之弗虔固無以感陰陽之和神奠茲土其忍則安用是

援令典以修明薦惟神鑒此精忱大需甘澤以蘇我田
穉則吏與民不敢忘神之德

靈濟廟

惟國有水旱長吏以下禱於山川之神令典也神能平
水與旱而朝廷爵之通侯優恩也先皇帝以神有勤德
始封為惠澤侯嘉定十七年秋出命而寶慶改元之秋
符到受誥之日民適以旱告某曰以令典奔走於廟吏
固不敢不虔受國之優恩而需然使膏澤下於民想神

於冥冥中亦不敢不敬天之休也

雨神

惟天地間陰陽相交而為雨雨所以沛天澤而潤萬物也國家舊典立夏後申日祭雨神某為邑長於斯豈敢簡彛有椒其馨有潔斯牲其明以承厥祀俾膏潤百里物無枯燥惟神其相之

社壇

國中之神莫貴於社所以受風雨達天地之氣也矧為

邑長於斯民以旱告則於社之禱其敢曰莫用是熏香
敬共壇壝之神儻蒙明神庇我穡事勅風霆以下膏澤
俾勿壞於垂成若是人民其敢忘報

諸廟

縣曰雷土田曰雷鳴夏秋之交水不滿盈曝以烈日田
毛如醒若茲不雨則壞於成既禱于社靡神不舉敬其
威靈庶回悔怒吏之不職罰止厥躬元元何辜罹此歲
凶燎香醺酒以祈甘澤驅風鞭霆湧出地脉水湧泉動

物嘉且美尚幾秋冬以享以祀

請石剏龍湫祝文

水以潤下孰尸其功在天為雨在物為龍雖曰異途一
氣感通維時季夏我稼既同驕陽為梗蘊蘊蟲蟲茲吏
之責憂心若忡越國以謀靡神不宗爰有石剏龍宅其
中用是緘香敢致敬恭請分靈湫沃此四封噓氣成雲雷
電以風庶幾西成不致歲凶神其鑒茲哀憫我農

謝風雷雨師祝文

伏以近者天久不雨心焦如焚四月為入梅田壟告旱
五月名瓜蔓河流就乾用密禱於宮庭及遍祈於山澤
沆蒙響應果霑甘霖占離畢之祥既開其始誕維寶之
璫永相斯成

立春祀五福十神祝文

攝提貞于孟陬方喜璿杓之換天神貴者太一載嚴玉
璫之祠爰迪舊章式誌明祀伏願上皇降監五福照臨
邊境息師盡洗旄頭之色田疇多稼更陳龍角之祥

立夏祝五福十神祝文

孟夏之律中呂吉日維良太一之壇三陟衆靈咸會爰
舉奏詞之典式祈嚮用之休伏願穆若上皇監於下土
星辰清潤邊無多壘之虞年穀豐登民識有生之樂

立秋祀五福十神祝文

伏以昴主西方月行白道其明者太乙麗於天庭之中
將懽兮壽宮錫爾下土之福式遵彝典用致精祈伏望
八極潛通十神昭假師干載戢拂除沴氣之妖稼寶極

登醞釀豐年之慶

海神生辰祝文

惟神廟食茲土庇佑我民屬臨誕期爰秩彛祀矧歲逢
荒札民尚阻饑米方航海而育風來秧正在田而淫雨
至願垂臨相時其雨暘庶幾民有粒食之期吏寬芻牧
之責惟神其鑒之

祈雪海神城隍祠山祝文

斗指兩辰曰閏巳就歲功雪於五穀為精更祈天瑞輒

薰一瓣徧禱羣祠伏願某神麾玄冥兮研冰令青女兮
碾玉霜蘇旱土已占麴麥之登成霰集良田更使螟蝗
之秉畀

祈雪社稷祝文

社稷之壇受霜露風雨以達天地之氣而雪不與焉故
吏不以祈雪告陋哉彼安知雪者霜之餘氣雨之清芬
積陰沍寒合成而為瑞者哉用是祇率官寮禱于壇壝
雨天花豐地寶以育人民惟神其惠之

謝雪疏

歲五風而十雨未嘗言郡境之全登地多燠而少寒豈
謂見瓦溝之一白矧置閏適逢於臘尾而飛霽猶在於
春前轉回天機實仗法力更願遺蝗入土終年無害稼
之憂厲鬼出山百姓有為生之樂

謝海神城隍祠山祝文

郡以溫得名片雪固難於到地瑞應誠而至一心端可
以格天矧飛潤麥之六花猶在先春之五日明神有德

太守何功密覆牛尻預有來歲豐登之望凍凝鴟吻更
無編氓疾癘之憂

謝社稷祝文

社神地道稷長五穀皆主陰也今時雪不降而有禱焉
豈非求諸陰之義哉一念纔興六花隨應不惟可卜來
歲之稼而庶民咸無疾癘之憂敢不敬共以謝

祭風師祝文

天以一氣運乎太虛散而為風潤纖澤枯邦有彛典吏

不敢渝祭有四時謹之在初粢牲既潔芳醑既儲以享以祀惟神其監於茲

邑之小祀五社稷雷雨神則兼祀而風獨專祭焉重始事也方春載陽萬物紐芽不得風以潤之則芽者不坼萌者不達何以施歲功於其後此祀事之不容不嚴爾是用敬共率遵彛典致祭於神惟神妙鼓舞之神司長養之事幸終惠之

春祭祀文

維暮之春三月三日邦有厥典明祀是秩其秩維何既
齊既稷我酒既旨我牲孔碩以祈蠶桑以保稼穡攘除
厲鬼驅逐蠱賊守則何功皆神之德是用祝告其年其
吉

祭海神祝文

周禮荒政十有二以散財薄征為首以索鬼神終焉夫
為天子牧民不先惠養而徒事禱祈神亦所不享也某
既抵東甌以元日奉詔布德又三日率典謁廟先勤民

而後致力於神者不敢不以其序也若夫時其風雨使
年穀順成盜賊屏息則有司海之責在

祭雷神祝文

惟天地間陰陽相薄而為雷雷所以代天言而動萬物
也國家舊典立夏後申日祭雷神某為邑長於斯豈敢
簡彛有苾其香有潔斯牲齊明以承厥祀俾震驚百里
物無疵癘惟神其鑒之

秋祭城隍祝文

祭有祈焉有報焉方亢陽用事時祈年而年祈雨而雨
祈穀而穀神亦可謂從民之欲矣陳牲設饗以報嘉德
固其所也然地之生者有限而民之食者無窮以報之
日為祈之始以今歲之稔致來歲之憂長吏曷嘗頃刻
忘於民哉夫足民之生而使之得以事神者吏之心也
相吏之勤而使之得以養民者神之德也敢以忱辭告
于有廟

奉安祠山城隍海神祝文

竊聞祠山為東壁之精天之神也城隍掌土地門行之
事地之神也滄溟滾滾海神司之水之神也神官三才
府萬物水旱凶荒必禱焉今既奉迎於茲轟天之庭出
地之雲揚海之波抑在神變化闔闔間耳幸安厥靈以
宏其施

奉安聖水祝文

湫在潭而嘘為雲出為雨者龍之變也水在瓶而徧灑
含生普霑法界者觀世音之變也今以聖水奉安于普

覺寺以靈感靈豈無致雨之道哉亟霈甘澤以慰民望

青龍水祝文

按東嘉志大龍湫飛瀑萬尋騰空而下神靈無與比方
則龍潛於山久矣今西成在望旱魃忽鳴民心皇皇懼
行百里而半九十矣扣之父老稱得湫龍之靈則激飛
瀑而為滂沱特變化間耳用敢齋肅乃心奉辭以告神
其聽之神其惠之

春祭海神城隍祠山祝文

孟春祈穀季春祈麥自天子至諸侯其祀一也屬春苦
雨近方開霽秧既壞矣而復萌麥既枯矣而復實若非
諸神闔陰闢陽安得一轉移之頃而生意滿田野耶用
率彛章式修明祀惟神其終惠之

告土地祝文

伏以廟門容局寧無工築地道貴靜必有司存屬吉日
之鳩工懼明神之未妥尚惟陰相俾遂燕寧

謝晴祝文

陰霖過度方虞民食之艱霽色應祈悉自佛乘之賜掃
頑雲於頃刻收積潦於汙洄唯菩薩現無極慈悲使生
靈受如是惠利敢忘報謝仰答靈私

